

Guijtz Ganid Lo Timoteu

Pabl rucuaa te guijtz lo Timoteu

1 Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni rusläa nuurnu lo dojl näjza Dad Jesucrist nani cholääznu. ²Timoteu, luj najclu si'cpac xinganä lo yälirililajz. Xtadnu Dios näjza Xtad Jesucristnu gacnäjl, gulaslajzreni luj, guscuecdxireni lastoolu.

**Pabl rulijdx xcuent reni
ruluii diidx-xhii**

³Che sia'ä reguedx Macedonia, gunibeä jia'nlu guedx Éfeso te gulijdxlu gaii bejn te na'c guluiireni garenca diidx, ⁴te na'c jitejreni rexcuent rebenttemp, te na'cza jiuduxhrene chu gujc rexpengoldooreni, sa'csi di rediidxre gacnäj guiroobru lastooreni si'c rustioob yälirililajz lastoonu. Naj rnibeä si'c chanuu gulijdxlu rebejn.

⁵Rulijdxnu bejn te ga'preni yälrinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni. ⁶Yu'reni abarö'n rediidxre, rieyjtis ro'reni saniduxhrene diidx ni xhet sajcdi.

⁷Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluiireni, räjpreni, 'didxliipac dee'.

⁸Anajnnu leii xten Dios najc sacduxhni, palga jiennu si'cni rniipacni. ⁹Najnnu di leii gac par bensa'c, najcni par reni najc beñlatsiaj ni di jiu leii xten Dios, näjza reni di gusoob diidx; par rebejn guiidx, näjza rebendojl; par reni di jiu Dios, näjza reni rusguee; par reni rugu't xtadni, xnanni, näjza guiraa reni rugu't bejn; ¹⁰par reni resnäj te gunaa ni digac chäälreni, näjza reni resnäj lagajc saniguiireni; par reni rbajn bejn; reni rnii didx-xhii; reni rnii didx-xhii si'c didxle' parsi rusguee sa'reni; näjza bejn ni rujn xhitis xhi xtee dzuun ni digac dzunsa'c, ¹¹nalajznu sa' redzunsa'c ni rulijdx xtidx Dios-le', diidx ni rusläa lo dojl. Narä biannää diidxre.

**Rudeedni xquixtios lo Dios
sa'csi rulaslajznini**

¹²Rdedä xquixtios lo Dad Jesucrist ni runiidx yälrnibee narä sa'csi najnni nasobdidxä, ni'cni guleni narä gunä xtzuunni. ¹³Luxh

galoo guniyaáani, birinalä xpejn̄ni, basacsíäreni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä. ¹⁴Niluxh lacti guroob gujc yälracnäj xte Xtadnu, guideb yälirililajz, näj yälsanälajz ni rajp Jesucrist.

¹⁵Diidxre najc guliduxh, nanab chalilajz pactuni: Jesucrist biääd lo guedxliujre te guslaani reben̄ dojl̄; lo reben̄ dojl̄ narä nacäru bendod̄duxh. ¹⁶Ni'cni balaslajz Dios narä, mase nacä bendod̄duxh lo guiraareni, te ganid con narä guluini xho rbäjz Jesucrist te chalilajz bejn̄ xtiidxni, te filoj reni churu chalilajz xtiidxni te ga'preni yäl̄nabajn̄ par tejpas. ¹⁷Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni col̄guiliä'p xpala'n̄ni, col̄gaj̄n̄ni guideb guibaj̄ntu nájza par tejpas. Si'c gacni.

¹⁸Xi'nä, Timoteu, dee najc yäl̄rulijdx ni runidxä lojlu te gucuaasa'clu si'c te soldaad ni abisieed, sigajc ni gunii reprofet̄ xcuentlu galoo. ¹⁹Di gunijtlu yäl̄irililajz, bejnza xhigabsa'c, sa'csi yu'reni abar̄o'n̄ xtidx Dios, ni'c abanijtreni yäl̄irililajz. ²⁰Si'c gusajc Himeneo näj Alejandro, luxh abatedäreni ladz̄naa bendx̄ab te guisieedreni na'c guiniya'reni Dios.

Ruluini xho guiniabreni lo Dios

2 Rulidxälu ganiddoo cueedxlu, guiniablu lo Dios, gudeedlu xquixtios lo Dios xcuent guiraa rebejn̄. ²Guiniabzalu xcuent rereii näj guiraa reni rnibee lo guedxliujre, te gac guiband̄xinu, te gac chanuunu xnez Dios, te saru

guibaj̄n̄nu. ³Sa' yäl̄rniabga najc laaca, luxh si'c rdxaglajz Dios ni ruslaa nurnu lo dojl̄ guiniabnu lojni. ⁴Dios rlajz laa guiraa bejn̄ lo dojl̄, rlajzani gacbeepacreni xtidxliini. ⁵Yu' tejtis Dios, nájza tejtisza nani rusiäj̄l̄ diidx lo Dios nájza loj reben̄ guedxliuj. Laani najc Jesucrist ni gujca niguii. ⁶Jesucrist gujt lo cruz̄ te gudijxni redojl̄ xten guiraanu ni tre' lo guedxliuj. Dee gujc che gojl̄ dxej ni gule Dios. ⁷Dios gule narä te gacä apost te gusule'ä xtiidxni, yäl̄irililajz nájza didxlii lo reni di gac xpejn̄ Israel. Si'c ni rlajz Jesucrist rniä didxlii, dina guiniä diidx ni rusguee.

⁸Ni'cni rlazä guiraatis lajt guiniab rebejn̄ lo Dios, saru guiliäs naareni, gusaanreni yäl̄rdxe'ch, na'c gunreni bieje. ⁹Si'cza regunaa, saru gacwreni xhajibreni, na'c gacreni gunaroxhi, cuedxireni. Xhet si'c di regunaa ni entis rsiucheduxh con oor o perl o ladsajc, rajc guichniil yej̄cni te guidxeloj bejn̄reni. ¹⁰Masru ruchaag gunreni si'cni rchalglajz Dios, si'c riäj̄l̄ gun guiraa regunaa ni yu' lo Dios. ¹¹Riäj̄l̄ dxitis gucuaiajg regunaa xtidx Dios ni rusule' reniguii. ¹²Dina xcäbä gusule' te gunaa diidx lo guiraa rebejn̄, niclaza guinibeeni lo reniguii, dxitis cueni lo rebejn̄ ni cagucuaiajg diidx nani cagusule'ni. ¹³Sa'csi ganid benchee Dios Adán, dxejctiru bencheeni Eva. ¹⁴Luxh et Adandi basguee bendx̄ab, bendx̄ab basguee gunaaga, dxejc biajbni nen̄ dojl̄. ¹⁵Niluxh siliaa regunaa, palga jiuren̄i xtzunreni si'c nan, palga chanuu chalilajzreni xtidx Dios, palga chanälajzreni sa'reni,

palga chutisreni lo Dios, gaczareni gunasa'c cuedxireni.

Xho riäjĭl gac reni rnibee

3 Dee najc didx gulii: palga rĭlaz te niguii ga'p dzuun xten Dios, gusule'ni xtidx Dios, guinibeeni rebejn, te dzunsa'c najc ni rĭlazjni gunni. ²Ni'cni, ni rĭlaz gac nani rnibee, riäjĭl guibansa'cni te na'c chu xhicient guiniyaj rebejn. Riäjĭl gacni chääĭl tejtis gunaa, riäjĭl susinni, gacni te beŋsa'c, cuedxini, te guibansa'cni. Riäjĭlza di gudxojnni rolizjni guidzujn bejn, nägajc riäjĭl gacni te bejn ni nansa'c te guluini. ³Na'c gacni te bengü, nicla te ni rdxagdijĭl bejn, na'cza gacni te nani rsia' lajzjni ga'pni xhidajĭl meel, riäjĭl cuedxi lajzjni, na'c chanälajzjni meel. ⁴Riäjĭl guinibesa'cni rolizjni, saru gunni te gusoob rexi'nni xtiidxni. ⁵Sa'csi palga di te bejn gan xho guinibeeni lagajc rolizjni, aticaxh gac ga'pni guidoo xten Dios. ⁶Di riäjĭl guinibee te beŋcoob nani entis huililajz, te di guschä'pni xpala'nni sas jĭajbni lo lagajc xcälĭnaj Dios ni biajb beŋdxab. ⁷Luxh riäjĭlza guinii reni di chalilajz xtidx Dios laaca najcni, te na'c jianxtujyni, te na'cza jĭajbni ladzŋaa beŋdxab.

Xho riäjĭl gac reni rcanäj neŋ guidoo

⁸Si'cza rediaconos riäjĭl gacreni bejn ni yu' xcäriejnreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan. ⁹Riäjĭl gapdzu'tzni rediidx nagajx xten yälĭrililajz, ni'c nanab gac naya lastooreni. ¹⁰Riäjĭl fixgaatu xho

nabajnreni. Palga nabaŋsa'creni, rutza gacdi gucuaquijdireni, sajc gacreni diacono. ¹¹Regunaa ni rĭlaz gac diaconas riäjĭlza chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun. ¹²Riäjĭl gac rediacono chääĭl tejtis gunaa. Riäjĭl guinibesa'cni rexi'nni näj guiraa reni yu' rolizjni. ¹³Sa'csi rediaconos ni runsa'c xtzuunni, sanälajz bejnreni, dizareni guidxejb rsiudzu'tz lastooreni lo xcälĭrililajz xtidx Jesucrist.

Gurobduxh najc yälxhiga'tz xten Jesucrist

¹⁴Cacuaä diidxre lojlu, niluxh rĭlazä jĭädhugaä la'tu. ¹⁵Luxh palga gacĭlä, anajnlü xho riäjĭl guibajn bejn roliz Dios, nalajznu xquidoo Gueb Dios ni nabajn par tejpas. Guidoore rniadszu'tz näjza rulüiiru didxlii xten Dios. ¹⁶Rdxeloyaduxh guiralii bejn yälxhiga'tz xten xcälĭnaj Dios:

Dios biääd lo guedxliuj si'c te benguedxliuj,
 Sprit Dxaŋ xten Dios gunii beŋdxanni;
 bahuii rexangl Dios lojni;
 basule'reni xtiidxni lo rebejn ni di gac xpejn Israel;
 guira lajt huililajz bejn xtiidxni;
 huäjsni lo xcälĭrdimbicha' Dios xhaguibaa.

Reni rbicaj lo xnezyuj Dios

4 Aguniipac Sprit Dxaŋ siääd redxej che chu reni guo'n yälĭrililajz, sucuadijgreni xtidx rebejn ni rusguee näj xtidx

rebendxab, ²nicla jiureni rniireni didx-xhii ni rusguee, sa'csi xhetiru xcäriejnreni, anajcni si'c najc cadre rudxujy te guiblaa: xhetru racbeedini. ³Suluii rebejnre na'c guchnaa bejn, suluiizareni na'c gau bejn guiraloj, niluxh Dios bejnpac redee te xca' rebejn ni rililajz, ni racbeeza didxlii, te gudeedreni xquixtios lo Dios. ⁴Guiralii reni benchee Dios najc laaca, di riäjł cuälaznu xhi rca'nu che rudeednu xquixtios loj Dios. ⁵Sa'csi xtidx Dios näj yälrbedx-rniab lo Dios runsa'c guira'ti.

Te ni runsa'c xtzuun Jesucrist

⁶Palga susnajlu lajz rebejtznu rediidxre, sajclu te mossa'c xten Jesucrist, luxh si'c sisieedruzalu diidx xten yälrlililajz, näj yälrluisa'c ni sanuulu. ⁷Na'c jiulu ni rni regunaroyei ni xheti xtzuunni. Bisieed sudzu'tz lastoolu lo xtidx Dios. ⁸Guxii sajc guinibduxh bejn te gusutijpni tiejxhni. Niluxh sacduxhru cucheeni xtidx Dios nen lastooni, sa'csi racnäjni bejn lo yäl'nabajre näjza lo yäl'nabajni ni najc par tejpas. ⁹Dee najc didxlii, riäjł chalilajz guiraatuni. ¹⁰Ni'c riennu dzuun, rdeednu trabajw, sa'csi cabäjznu Gueb Dios ni nabajni, ni ruslaa bejn lo dojl, ganiddoo renani rililajz xtiidxni.

¹¹Sajplu guinibeelu soob rediidxre, näjza guluiilu rediidxre. ¹²Di gusaanlu cuälazreni luj sa'csi najclu bi'n; riäjł gaclu te ni suu te fii guiraa reni rililazsa'cpac xho rniilu, xho nabajni, xho sanälajzlu sa'lu, xho rililajzlu, näjza xho rajplu xhigabsa'c. ¹³Lał ni guidzunä ro'c,

bił xtidx Dios lo rebejn, balijdxreni, baluiiza xtidx Dios lojreni. ¹⁴Di gusaanlu reyäl'najni ni baniidx Dios lojlu cheni basuj rebengool naareni yejclu por xtidx Dios, guniireni diidx xcuente nani churu gac.

¹⁵Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidx Dios. ¹⁶Gopdzu'tz lagajc luj näjza rediidx ni ruluiilu; guzudzu'tz lo guiraa rediidxre, te si'c laalu lo dojl, te laaza reni rucuaadijag xtiidxlu.

Xho guibanäjnu reni rililajz

5 Na'c quidxa'lu loj te bengool; guninäjni si'c xtaclu, balijdx rebi'n si'c bejtzlu, ²balijdx renanbengool si'c xnanlu, balijdx redxap steeb si'c rebisiajnlu con rehxigabsa'c.

³Gucnäj rebiuud ni guliipac rquiin chu gacnäjreni te chu xhi gaureni. ⁴Niluxh palga yu' chu biuud yu' xi'nni o xajgni, suguisiedxgaareni guiban nayareni lo xnez Dios, te quiixreni di'n ni nasäabreni lo xtaclreni, näj xnanreni ni baslaareni, sa'csi ni'c najc laaca, rdxagajzza Diosni. ⁵Gunaa ni najcpac biuud, abia'n xtebni, ni'c rbäjztisni lo Dios, dxex-yääl rbejdx-rniabni lo Dios. ⁶Niluxh biuud ni nabajni cadedgustisni najc si'c te ni agujt nen dojl. ⁷Basule' rediidxre lojreni te rut gucuaquijdireni. ⁸Palga yu' chutej ni di gacnäj resa'ni, lagajc reni rbäjz rolizni, ni'c agulälaz xtidx Dios, benguijdxru najcni lo rebejn nani di chalilajz xtidx Dios.

⁹Di gucuaalu laj rebiuud lo guijtz te gacnäjtuni palga gajdni chu gayojni ijz. Riäjłza gac biuudga

te gunaa ni gubannäsa'c chäälni.

¹⁰Riäjłza gumbee bejn̄ni xcuent redzunsac'c ni rujnni; palga baslaani rexi'n̄ni, palga badedlaani rolijzn̄i gues beñ zıjt, palga gudiibni ni' rexepeñ Dios te si'c guzeñ xcäl̄nadolajzn̄i, palga racnäjni reni rdejđ trabajw, palgaza riuni rujnni guira'ti redzunsac'c.

¹¹Niluxh na'c gucuaalu laj biuud ni yu' guxiiru ijz sa'csi che guichaglajzreni te niguii, siällajzreni diidx ni bia'nreni lo Jesucrist, te rłajzn̄i guchn̄asacreni.

¹²Dxejc siu'reni neñ dojl̄ sa'csi rbälazreni rediidx ni bia'nreni che galoo bejnreni xhigab ninuureni lo xtzuun Dios. ¹³Dxejc sia' lojreni xhet gundireni, rijreni rolijz bejn ricuereñi. Luxh malaii ni'ctis gunreni. Niluxh rliäszareni didxxhii, richu'reni lo xhitis, rniizareni diidx ni di guchaag guiniireni.

¹⁴Ni'cni rlazä rebiuud ni najc dxa'pru guchn̄aareni stehuält, chu xi'nreni, fisa'creni rolijzreni te na'c guiniyajreni rebejn̄ ni rdxe'ch lojnu.

¹⁵Sa'csi yu' gaii biuud ni alagubicaj lo xnez Dios sanajlreni beñdxab.

¹⁶Pal yu' tej resa'nu ni najc sa'ni te biuud, riäjł gacnäjñini, na'c gusaanni gutajłni xtzuun guidoo, te si'c guidoo sajč gacnäj rebiuud ni rquinpac chu gacnäjreni.

¹⁷Rebengool ni rnibesa'c guidoo, riäjł chanälajzrutureni näj gudeedrutu guiraa nani rquiniireni, si'c najc reni rusulesa'c xtidx Dios, rulidxsac'reni la'tu con xtidx Dios.

¹⁸Sa'csi lo xtidx Dios caj scree: "Na'c gusällu guijxh ro' gon che rusiani triuu"; si'cza caj stee diidx: "Riäjł gax bejn̄ ni rujn dzuun."

¹⁹Na'c cucuadiajglu xtidx tej ni rucuaquij te bengool palga ruti tio'p, choñ testiigw. ²⁰Niluxh reni sanuu rujntis dojl̄, riäjł gulijdxlureni nez loj rebeñ guidoo, te näjza laareni guidxejbreni. ²¹Nez loj Dios, nez loj Dad Jesucrist, nez lojza reangl ni gule Dios, rulidxduxhälu chanuulu lo rediidxre, na'c jiurulu tej bejn̄ lo sa'ni. Bejn tebloj loj guiraa rebejn̄. ²²Na'c gusiojb lajzlu gusuju lu naalu yejc te bejn̄, te gacni beñ guidoo palga gajđni guisieed guibañsa'cni lo xnez Dios sa'csi lagajč yejclu jiajb rextojłni. Gubicaj lo guiraa dolguijdx.

²³Na'cru yälu ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexčäl̄racxhuulu.

²⁴Yu' bejn̄ ruzengajc rextojłni ni'c rajcni castiigw, niluxh yu' bejn̄ ni di xtojłni guzengajc. ²⁵Sigajcsa redzunsac'c ni rujn bejn̄; yu'reni ruzengajc, niluxh mase dini guzengajc, digacdi jianxhiga'tzni, sidzujñ dxej suzeñni.

6 Reni najc mos riäjł cuadiajgreni xtidx xlamreni, te na'c guiniyaj rebejn̄ laj Dios niclaza xtidx Dios ni rusule'nu. ²Palga yu' remos ni najc xlamni te nani rililajz, na'c cuälazreni rextiidxni sa'csi najcni bejtzni lo xcäl̄rililajz Jesucrist. Riäjł gusa'cruene xtzuunni, sa'csi najcni sa'ni loj yäl̄rililajz xten Dios, luxh sanälajzarenini. Rediidxre baluii, basule'.

Yäl̄nabañsa'c näjza te lastoo ni rbedxi

³Palga yu' chu ruluii garenca diidx, diidx ni digac didxsac'c, si'c najc xtidx Jesucrist, näjza xhet si'c diidxdi ni

ruluii xho guibaṣa'c bejn, ⁴bejnga rlaḷz guiliä'p lagajc xpala'n̄ni, niluxh xhet najndini. Si'c te yälguijdx yu'tis yejcn̄i yälguiniab diidx, yälrdil̄diidx. Luxh redee rujn rdxe'ch lajzreni, rujnni rdxe'ch bejn lo sa'ni, rujnni rniyaj bejn, rujnzani di bejn guinisa'c lo sa'ni. ⁵Rujnzani rdil̄näj bejn sa'ni. Guiraa redee gun bejn ni aguxhij̄n xcäriejn̄ni, bejn ni diru ga'p didxlii. Rchaloreni sujnreni ganduxh xcuent rediidx ni ruluiireni. Gubicaj lo sa' bejnre. ⁶Niluxh yäl̄nabaṣa'c näjza te lastoo ni rebedxi, redee sa'cduxh. ⁷Sa'csi xhet biopnädinu lo guedxliujre, luxh sigajcza xhet sajcdi chonänu che guetnu. ⁸Niluxh palga rajpnu xhi gaunu, xhi gajcwnu, con ni'c riäj̄l guibalaaznu. ⁹Niluxh reni rlaḷz ga'p xhidalduxh meel, riajbreni lo xhigab guijdx, rujnzareni xhidajl dzuun ni xhet sajcdi, ni rujn daan, ni rusiääz bejn lo yäl̄ruxhin̄, lo yäl̄rnitloj. ¹⁰Sa'csi yäl̄rinälajzni meel najc xlobaa guiraa redzunguijdx. Yu'za bejn ni rlaḷzduxh ga'pni meel, rusaanreni xcäl̄rililajz Dios, dxejc lagajc laareni rujn rdedduxhreni trabajw.

Dzun-huen xten yäl̄rililajz

¹¹Niluxh luj, bejn xten Dios, baxu'n̄ lo guiraa dee, te chanuulu lo xcäl̄xhigabsa'clu näjza yäl̄nabaṣa'clu; te chanajllu yäl̄rililajz näjza yäl̄sanälajz; te chanuulu lo yäl̄rbecdxi lajz näjza yäl̄nadolajz. ¹²Benduxh dzuun xcuent yäl̄rililajz Jesucrist, gunazdu'tz yäl̄nabajn̄ ni najc par tejpas. Ni'cni gurejdx Dioslu, luxh aguniilu rililajzlu xtidx Dios nez loj xhidajl bejn, te anancheereni.

¹³Naj rulidxälu nez loj Dios ni rudeed yäl̄nabajn̄ lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't, ¹⁴rnibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jiääd Xtaḷ Jesucristnu. ¹⁵Sidzuj̄n dxejga nani agunii Dios guidzuj̄nni. Dios ni najc le' sujn scree sa'csi laatisni najc Dios, najcni reīi xten rereīi, rnibeezani reni rnibee. ¹⁶Laatisni dini guet, nabajn̄ni lo bianij cadro rut rajcdi rb̄ig. Nicla te bejn gajd fii lojni, niclaza gac fiireni lojni. Xtebtis laani riäj̄l ga'p rebejn xpala'n̄ni. Laani rajp yäl̄rnibee par tejpas. Sugacni si'c.

¹⁷Balijdx reni rajp xhidajl xhixtenni lo guedxliujre, na'c guschä'preni xpala'n̄reni, niclaza chanälajzreni xhixtentisreni. Huenru chanälajzreni Dios ni nabajn̄, ni runiidx loonu guiralii xhixtennu ni rquiinnu te guibalajznu. ¹⁸Balijdxreni gunreni dzunsa'c, gundajnreni dzunsa'c, gacnäjreni reni xhet rajpdi, cuenäsa'creni sa'reni. ¹⁹Si'c ga'preni yäl̄nasa'c ni guzudzu'tzreni che jiääd Jesucrist, te guiniatztu'tzreni yäl̄nabajn̄ par tejpas.

Rulijdxni Timoteu

²⁰Timoteu, cuenäḷ ni rniä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl̄najn'. ²¹Sa'csi yu' reni sanuu yäl̄najnre ni'c banijtreni lo Dios xcuent yäl̄rililajz. Gacnäḷ Dios luj. Sugacni si'c.